

Prome minister ta enfatisa coherencia di maneho di gobierno

ORANJESTAD – Prome minister Mike Eman a enfatisa e coherencia di maneho di gobierno durante su presentacion di e vision di e gabinete pa e hefenan di departamentonan, instancianan y companianan di gobierno na Renaissance Convention Center fin di e siman pasa.

Segun e mandatario e coherencia di maneho di gobierno ta hopi importante. “Riba diferente nivel esaki ta hopi necesario, pero mas ainda riba e nivel ministerial.” Segun prome minister ta hopi importante pa conseho di minister ta un entidad caminda cu ta traha hunto en bes di simplemente traha banda di otro. “E por zona logico, e por parce simpel, pero toch tabata tin añanan durante di periodonan di diferente colornan politico caminda coherencia den gobierno, harmonia den conseho di minister y harmonia den pais no tabata asina automatico.”

El a sigui splica cu den pasado tabata tin hopi momentonan cu tabata tin ministernan den conflicto cu otro, no unicamente den sentido politico,

pero tambe di maneho haciendo e liña di maneho uno confuso. El a duna un ehempel caminda cu un “minister di labor ta bisa e mercado ta cera pa proteha esunnan local y di otro banda permisionan ta wordo otorga pa hendenan bin establece na Aruba of pa traha centenares di cambernan di hotel pa cual nos tabata sa cu nos no tin empleado na Aruba.”

Pa esey e coherencia den maneho y e coherencia den e liña cu mester cana ta un responsabilidad hopi grandi di e minister na cabes, segun Eman. Coherencia den maneho ta loke ta haci posibel cu vision di un pais por keda realisa di un manera efectivo, pero tambe cu repercusionnan positivo pa henter comunidad.

“Nos ta para na vispera di añanan solido, unda nos por segura e prosperidad di nos pais por wordo traduci den un bienestar general.” Y esaki ta pa motibo cu for di nivel di mas halto te mas abou den gobierno ta traha segun un coherencia di maneho, e mandatario ta haya.

Traha pa e comunidad

E prome minister a cuminsa su discurso gradiciendo su ministernan, cu ta sali hopi biaha for di trabounan den sector priva cu ta miho compensa, cu mas seguridad y hopi biaha cu hopi mas tranquilidad cu nan tin awor aki. El a sigui splica cu, “e ta conta pa director y cabes di departamentonan tambe. Pasobra mi conoce hopi director y cabes di departamentonan cu continuamente sector priva ta ranca na nan cu ofertanan hopi atractivo pa traha den sector priva. Y nos no por kita cu aki y aya nos ta perde un par di nan, pero hopi ta keda, y ta keda unicamente pasobra nan kier sirbi e interes general, cu ta e trabou esencial pa cua nos a wordo yama, tanto nos como gobernante, pero boso tambe, como director y cabes di departamento, consehero y esnan cu ta carga e departamentonan. Boso ta sirbi lo ta yama na Hulandes: e publieke zaak. Danki pa esey, pasobra hopi di boso ey ‘fo por gana un salario hopi mas confortabel, pero boso a

scoge, cu boso estudio, boso talento, cu boso kier sirbi e interes general.”

Prome Minister a dedica un parti di su discurso na duna e ehecucionan un bista di e situacion di Aruba tabata na 2009, pakico a scoge e rumbo di percura pa bienestar general, te con leu a logra e meta, pero tambe a papia di e proyectonan cu gobierno ta bay ehecuta den e periodo nobo, principalmente den area di energia sostenibel cu lo haci Aruba un ehempel pa paisnan rond mundo. Den esaki a menciona manehonan cu a conduci na reduccion di tarifa di awa y coriente, reparatie-toeslag pa esnan vulnerabel y indexering na trahadonan publico durante cuatr aña.

Recuperacion

Durante su presentacion Eman a mostra cu na momento cu a cuminsa cu gobernacion na 2009 a concentra riba maneho di e crisis, pa despues haci reformanan structural, a cuminsa cu construccionnan pa na 2013 yega na e punto di recuperacion y

pa den e siguiente gobernacion sigui riba prosperidad y bienestar general, cu ta e punto cardinal.

Den balans

Hopi organisacionnan ta representa interesnan particular den nos comunidad y ta haci trabounan pa drecha aspectonan di nos comunidad, segun Eman. Tur ta traha den concierto cu gobierno, pero e meta principal di gobierno, ta un enfoke nacional riba cual e pais mester cana. “Nos como gobierno mester pone interes di tur e organisacion y esnan cu no ta representa den un balans. Nos ta encarga pa pone e linea pa cana y inspira henter comunidad pa kere den e linea y hunto cane.” E prome minister a bisa cu despues di a scucha e maneho cu cada un di e ministernan di su Gabinete kier hiba y loke nan kier logra, e ta sinti su mes hopi orguyoso. “Tur e ministernan a papia di e mesun linea aki. Bienestar general di e ciudadano, basa riba e atencion cu delaster ciudadano riba e pais aki mester haya.” □